

Messadi dil parlament communal per mauns dalla votaziun all'urna dils 26 da november 2023 pertucont concessiun d'in dretg d'utilisaziun special per la construcziun d'in implont fotovoltaic grond sin l'Alp da Rueun per mauns dall'Axpo Solutions AG

Preziadas habitontas, prezai habitonts

Implants solars alpins dattan oz discussiun en tuttas medias. Els duein gidar da cumbatter la munconza d'energia che smanatscha igl unviern. Era la vischnaunca dad Ilanz/Glion ha retschiert la fin digl onn 2022 duas damondas dall'economia d'electricitat pertucont implants fotovoltaics alpins. Las damondas serefreschan all'Alp da Schnaus ed all'Alp da Rueun. Tenor la carta da radiazion globala dalla confederaziun ein omisdus territoris fetg adattai per la producziun d'energia d'unviern. Proprietaria da terren ei en omisdus cass la vischnaunca dad Ilanz/Glion. Ella sto dar il consentiment per realisar ils projects. La cumpetenza da conceder dretgs per in diever special, che surpassa la durada da 20 onns, ei tenor art. 31 al. 1 lit. e dalla constituziun communal tier la cuminanza dallas votantas e dils votants all'urna. Per quei motiv suttametta il parlament communal la fatschenta a Vus per decisiun.

1. Situaziun da partenza

En vesta dalla strategia d'energia, dall'amplificaziun d'energias regenerablas sco era dil provediment d'electricitat segir, oravontut duront igl unviern, ha l'assamblea federala integrau ils 30 da settember 2022 el rom dallas «mesiras urgentas per metter a disposiziun in provediment d'electricitat segir duront igl unviern», il niev art. 71a ella lescha d'energia. Cun agid d'in conclus d'urgenza ei quel ius en vigur gia igl 1. d'october 2022 (express solar).

1.1. Directivas dil dretg federal

Il niev artechel preveda levgiaments per las premissas da permissiun per implants fotovoltaics gronds sco era lur promozion cun in'indemnisaziun unica ch'ei vegnida fixada en il cass singul da tochen 60 pertschien dils cuosts

d'investiziun imputabels. Las premissas d'applicaziun valan denton mo aschigigt ch'ins sa contonscher cun ils gronds indrezs fotovoltaics ell'entira Svizra ina producziun annuala da totalmein 2 TWu.

Ils 17 da mars 2023 ha il cussegl federal decretau sin il scalem dall'ordinaziun las disposiziuns executivas necessarias per realisar questas disposiziuns (EnV3 ed EnV4). Da quei resultan ulteriuras perscripziuns per la permissiun d'indrezs fotovoltaics gronds.

La construcziun d'in indrez grond da fotovoltaic drova – ultra d'ina lubentscha cantunala da construcziun – d'ina vart in consentiment (politic) dalla vischnaunca da domicil e da l'autra vart in consentiment dil proprietari funsil. Tier igl implont fotovoltaic grond planisau sin l'Alp da Rueun ei la vischnaunca dad Ilanz/Glion la vischnaunca da domicil e plinavon proprietaria dil terren.

1.2. Situaziun da provediment en Svizra

La Svizra stat avon ina gronda sfida: Entochen igl onn 2050 mauncan rodund 50 uras terawat electricitat. D'ina vart svaneschan las ovras atomaras ina suenter l'autra dalla reit. Da l'autra vart s'augmenta il basegn da forza electrica cun la mobilitad electrica carschenta, il diever dallas pumpas da calira ed outras tecnologias. Ils davos onns ei bein vegniu investau els indrezs hidraulics existents, in engrondiment ei denton bloccaus ed ei regia ina digren muort las perscripziuns dall'aua restonta.

Tier l'extensiun dall'energia solara vesa l'Axpo grond potenzial en Svizra sco era ell'entira Europa. Quei potenzial sto exnum vegnir tratgs a nez. La largia d'energia sa sulettamein vegnir stuppada sche las energias regenerablas vegnan rinforzadas cumplettamein.

2. Avantatgs dil project ord vesta dalla vischnaunca

Implants fotovoltaics gronds produceschan electricitat ord glisch dil sulegl e valan aschia sco fontauna d'energias regenerablas. Els possibiliteschan ina schubra producziun d'energia senza emissiuns e prestan aschia ina contribuziun impuronta per dapli independenza da carburonts fossils e dapli protecziun dil clima. Indrezs fotovoltaics alpins produceschan cun mintga singula cella solara sur igl entir onn ora dapli electricitat ch'indrezs solars sin tetgs ni vid fassadas. Els produceschan rodund la mesadad dall'electricitat duront igl unviern, vul gir denter october e mars. Ils gronds indrezs contonschan ina durada d'utilisaziun da prevedentamein 30 tochen 40 onns ed ein aschia fetg durabels ed efficients. Els portan evidentamein dapli segirtad dil provediment ch'indrezs sin tetgs ella bassa. La producziun d'energia ord in grond implont fotovoltaic ei decentrala ed independenta da generaturs centrals da forza electrica. Cheutras sa vegnir

augmentada la segirtad dil provediment d'energia. Oravontut tier catastrofas dalla natira ni interrupziuns dalla forza electrica sa la producziun dall'electricitat ord in implant fotovoltaic grond gidar da mantener il provediment. Implonts fotovoltaics gronds san era contribuir ad ina creaziun da valur locala. L'installaziun ed il menaschi digl indrez drova persunas qualificadas e survetschs el liug. Quei scafflescha plazzas da lavour e rinforza l'economia locala.

Resumau selain enumerar ils suandonts avantatgs:

- schubra producziun d'energia senza emissiuns
- contribuziun alla protecziun dil clima
- rodund la mesadad dalla producziun succeda duront il semester d'unviern
- producziun d'energia decentrala
- ils indrezs ein fetg durabels ed efficients
- contribuziun impurtonta per la segirtad dil provediment electric
- creaziun da valur locala


3. Disavantatgs dil project ord vesta dalla vischnaunca

La realisaziun digl implant fotovoltaic grond sin l'Alp da Rueun pretenda ina gronda surfatscha dall'alp. Igl indrez influenescha la fauna e flora sin igl intschess pertuccau ed ha consequenzas sin l'alpicultura el liug pertuccau. Tenor las spetgas dalla possessura ed interpretura digl indrez duei la construcziun digl indrez solar planisau tuttina possiblitar vinavon la pasculaziun dalla biestga. Entochen oz ein las consequenzas davart la raccolta da fein ni era il secuntener dalla biestga entuorn indrezs solars alpins buca perscrutai. Igl indrez influenescha era la selvaschina e la catscha sin igl intschess pertuccau.

Resumau selain enumerar ils suandonts disavantatgs:

- diever d'ina gronda surfatscha da terren
- consequenzas per fauna e flora
- consequenzas per l'economia alpestra
- consequenzas per la selvaschina e la catscha
- disturbi dil maletg dalla cuntrada ed impediment per il diever turistic

4. Implant fotovoltaic Alp da Rueun Sura: Rapport tecnic



Maletg 1: Visualisaziun implot fotovoltaic Alp da Rueun

4.1. Possessura digl indrez Axpo

Igl implot fotovoltaic grond duei vegnir baghegiaus e menaus d'ina ovra elctrica ch'ei aunc da fundar. Igl acziunari da quella SA ei l'Axpo:

Axpo meina ensemens cun partenaris varga tschien ovras electricas. Axpo ei la pli gronda producenta d'energias regenerablas en Svizra e piuniera internaziunala el commerci d'energia ed en la commercialisaziun da forza solara e da vent. Sur 6'000 collaboraturas e collaboraturs colligan experientscha e know-how cun la pissiun per l'innovaziun e cun la tscherca communabla per meglieras sligiaziuns. L'Axpo metta igl accent sin tecnologias innovativas per ademplir ils basegns multifars da sia clientella en varga 30 tiaras ell'Europa, America dil nord ed ell'Asia.

4.2. Avantatgs d'indrezs solars alpins ord vesta dall'Axpo

Igl indrez solar al mir da fermada Muttsee el cantun Glaruna, che l'Axpo ha già realisau, producescha duront il semester d'unviern intragliauter entochen tschun gadas dapli electricitat che indrezs solars ella bassa. Ils avantatgs d'indrezs solars alpins ein:

- en general irradiazion intensiva dil sulegl pervia dall'atmosfera fina
- dameins nebla e nibels ch'ella bassa, quei ch'augmenta il recav considerablamein
- grazia alla reflecziun ferma dalla glisch dil sulegl sin la neiv san vegnir installai panels solars bifacials, quels augmentan supplementarmein la producziun d'electricitat sin la surfatscha

- las temperaturas bassas en quell'altezia fan pli efficient ils panels solars
- en cumparegliaziun cun la bassa sa la medema surfatscha purtar entochen 50 pertschien dapli productivitat

Facit: La Svizra ha grazia allas alps ina pusseivladad extraordinaria d'engrondir spert la producziun d'electricitat e d'augmentar aschia igl agen provediment duront igl unviern.

4.3. Liug da staziunament

Sin ina surfatscha da ca. 500'000 m² sin l'Alp da Ruen Sura savess in implont fotovoltaic cun ina capacitat da 30 megawatpeak (MWp) producir ca. 50 milliuns uras kilowat (kWu) ad onn. Cheutras savess vegrur curclau il diever annual da rodund 9'400 casadas.



Maletg 2: Perimeter dil project (stan dalla planisaziun settember 2023)

Topografia, terren da baghegiar

Il perimeter dil terren ch'ei definius per construir igl implont ha in relief geologic cumplex. Las cundiziuns per francar igl implont solar ein pusseivlas ord vesta geologica ed idrogeologica.

Prighels dalla natira e rescas

La situaziun dils prighels dalla natira vegn giudicada el rom d'ina expertisa. Sche necessari sa il perimeter d'indrezs vegnir adattaus alla situaziun da prighel.

Grevezias preliminaras dil liug

Igl indrez cunfinascha dalla vart orientala directamein cun ina lingia d'aulta tensiun existenta.

Protecziun dalla natira e digl ambient

Il liug ademplescha tuttas premissas legalas per construir in implont fotovoltaic grond el rom digl artechel 71a dalla lescha d'energia (LEn). Al liug dat ei negins biotops d'imporzonza naziunala tenor art. 18a dalla lescha federala davart la protecziun dalla natira e dalla patria (LNP), negins reservats d'utschals dall'aua ed utschals migrorts tenor art. 11 dalla lescha da catscha e neginas palius e cuntradas da paliu tenor art. 78 al. 5 Cst. resp. art. 23d LNP. El sidost digl implont sesanfla tenor las cartas geologicas dil Grischun ina cuntrada da paliu regiunala. Quella surfatscha ei vegnida risguardada e vegn buca nezegiada.

Integrazion ella cuntrada

Las contempladras ed ils contempladers han per gronda part ina gronda distanza tier igl implont, aschia che quel occupescha mo ina pintga part dalla vesta ed ha tras quei negin effect dominont el panorama da muntogna.

Visibladad

Il liug ch'ei vegnius elegius sesanfla en gronda distanza tier il proxim territori habitau e perschuada pia dall'enesta pli difficila naven dil territori habitau spess ella val. Dalla vart visavi dalla val (p.ex. Sursaissa) ves'ins igl implont ord gronda distanza.

Gruppas d'utilisaders

Lingias d'aulta tensiun meinan sper igl areal vi. Quellas ein vegnidias untgidas cun ina distanza da segirtad sufficienta. Sendas da viandar existentas ein vegnidias risguardadas cun fixar il perimeter d'indrezs. La cultivaziun dall'alp vegn vinavon ad esser pusseivla. En cunvegnientscha cun ils cultivaders e cun ils cussegliaders dil Plantahof ston vegnir pridas mesiras corrispondentas.


4.4. Colligiazion alla reit d'energia

Sin il perimeter sco era ella vischinonza directa digl areal sesanflan neginas pusseivladads da spisgentar directamein la reit. Las colligiazions pusseivlas las pli vischinontas ein la staziun da trafo 603 Pigniu Vitg (ca. 1.1 km) ed il lag da fermada Pigniu (ca. 2 km) en direcziun occidental sin nivel dalla reit 5. El sid dil perimeter ein la staziun da trafo 134 Siat Prada sura (ca. 2.2 km) ed en direcziun orientala la tschaffada d'aua Ual da Siat (ca. 2.7 km).

Igl ei pusseivel da spisgentar ils 10 pertschien pretendi dalla prestaziun digl indrez tier tut ils puncts numnai. Cura ch'igl implont ei baghegiaus cumplettamein e cun l'entira prestaziun, sto la reit existenta vegrondida.

La carta (maletg 3) muossa in extract dallas differentas lingias existentes. Ultra da quei ein las lingias per ils cables per spisgentar l'energia ella reit vegrondida coluradas ella carta.

Las variantas vegrondida examinadas en in proxim pass.



Maletg 3: Carta GeoGR colligiaziun alla reit (mellen - nova colligiaziun, blau - existent Repower)

4.5. Staziun da transformaturs e d'alternaturs

Pil plazzament dils alternaturs, transformaturs e dils indrezs da distribuziun ei previda ina sligiaziun decentrala. Sch'ei vess da veginr fatg diever da containers vegnessen quels integrali ella cuntrada. Ils indrezs vegnan survigilai e gestiunai d'in sistem da controlla.

4.6. Vias d'access

Il liug da staziunament ei accessibels sur ina stretga via d'alp che sa buca veginr duvrada per ils viadis al pazzal. Per furnir il material sil pazzal da baghegiar eis ei per quei motiv previu da construir ina pendiculara da material. Quella pendiculara duei colligar il pazzal naven dalla via cantunala a Rueun. Sco alternativa ein auters vials per la pendiculara pusseivels.

4.7. Realisazion digl indrez entochen alla fin digl onn 2025/2030

Per ch'il stabiliment vali sut il conclus federal urgent sto el furnir silmeins 10 pertschien dall'energia planisada ella reit entochen la fin digl onn 2025. Il rest dil stabiliment sto esser terminaus entochen sil pli tard la fin digl onn 2030. Quei urari stretg, oravontut per la furniziun d'energia dils emprems 10 pertschien, caschuna che las pretensiuns ston buca mo veginr ademplidas, mobein era ch'ellas ston veginr realisadas spertamein.

4.8. Datas tecnicas

prestaziun digl indrez	~ 30'000 kWp
producziun annuala	~ 44'000'000 kWu (9'400 casadas)
cumpart d'unviern	~ 40 pertschien
meisas da moduls	~ 7'200 tocs
moduls fotovoltaics	~ 72'000 tocs
staziuns da transformaturs	~ 30 - 40 transformaturs
alternaturs	~ 120 tocs
surfatscha totala	~ 40 ha

4.9. Meisas da modul

La descripziun suandonta dalla construcziun ei buca finala cunquei ch'il project sesanfla aunc adina ella fasa preliminara. Differents sistems vegnan aunc evaluai cunquei ch'ei dat numerus facturs d'influenza sco p. ex. prighels dalla natira, ambient, logistica, alpegiaziun ch'ei vala era da risguardar. Quei vala era per la tematica descretta ella suandonta cefra 4.10, encablament dils moduls.

Construcziun

La construcziun dallas meisas da modul consista d'ina construcziun da fier. Ils moduls fotovoltaics vegnan construi a partir d'ina altezia da rodund 3 meters sur tiara. L'altezia sur tiara dependa d'ina eventuala pasculaziun sco era dall'altezia da neiv pusseivla en quei territori. Dus pertaders e duas petgas francadas ella tiara surmuntan quell'altezia. La sutconstrucziun ei veginida concepida aschia ch'ella sa tener encunter a grondas forzas da vent ed a gronds squetschs da neiv. Ils moduls da fotovoltaic ein fixai vid in rom robust da fier. Las mesiraziuns e la grondezia dil rom ein veginidas tscharnidas cun quitau per garantir ch'el sappi veginir transportaus senza problems cun tut ils mieds da transport pusseivels.

La montasca dallas meisas da modul ei sempla ed efficienta. Ina gronda part dallas lavurs da montasca vegnan fatgas gia a val, nua che las meisas da modul vegnan premontadas e silsuenter pertadas el liug final. La construcziun dallas meisas da modul ei concepida aschia che la premontasca sco era la montasca el liug sa veginir fatga a moda speditiva.

Cun concepir las meisas da modul vegin mirau specialmein sin la vart davos dils moduls fotovoltaics (bifacials) che ha in effect dubel e sa utilisar aschi bia sco pusseivel dalla radiazion dil sulegl reflectada dalla cuvretga da neiv duront igl unviern. Quei augmenta supplementarmein la producziun d'electricitat solara duront igl unviern.

Francaziun

La francaziun dallas meisas da modul vegin fatga el terren cun agid da pals che san recepir schibein las forzas da tracziun sco era las forzas da pressiun. Quellas francaziuns ein veginidas concepidas aschia ch'ellas san veginir construidas cun maschinas ed apparats sempels che schanegian il terren.

4.10. Encablament dils moduls

Enteifer las retschas dils moduls vegnan ils cabels tratgs en bischels denter las meisas da modul ora. Aschia ein quels schurmegiai da radis ultravioletts. Igl encablament denter las retschas da moduls ed ils alternaturs succeda en lingias betunadas en bloc e tras canals da cabels.

Ellas lingias betunadas en bloc vegin medemamein tschentau in fil da tiara vid il qual las retschas dallas meisas da modul vegnan colligiadas. Quei ei in element dil concept dalla protecziun encunter il cametg.

4.11. Logistica

La logistica vegn ad haver ina gronda impurtonza ch'ei buca da sutschazegiar. D'ina vart dat ei la logistica da Glion entochen sin igl intschess dil project e da l'autra vart ha la logistica dalla montascha el liug ina grond'impurtonza.

Il liug dall'Alp da Rueun Sura ei accessibels sur ina via stretga d'alp che sa buca vegnir duvrada per in menaschi da pazzal regular. Per il provediment dil pazzal ei perquei planisau ina pendiculara da transport che duei esser accessibla directamein dalla via cantunala naven da Rueun. Aschia vegnan la vischnaunca, las habitontas ed ils habitonts sco era las vias communalas protegi encunter il grond traffic en connex cun ils transports da material.

En cass d'in tal project ston grondas surfatschas da deposit e da cargar vegnir planisadas el contuorn, aschia che las surfatschas disponiblas dalla staziun da val tonschan prevesiblamein buca per la pendiculara da material. Il motiv per il grond basegns da surfatscha ei per l'ina la gronda quantitat da material sco era la spertadada da transport grev calculabla (cundiziuns dall'aura, uras da furniziun) dalla pendiculara. Pervia dallas cundiziuns da montascha pli difficilas el territori alpin vegn a seresultar in basegns da plazzas da montascha per la prefabricaziun (p.ex. montascha sutconstrucziuns preliminaras) en loghens pli bass. El rom dalla procedura da permissiun vegn elavurau in concept da traffic.

4.12. Cuosts e rentabilitad

Il pli impurtont per igl investur pertucont in stabiliment da producziun aschi grond ei la rentabilitad. Cunquei ch'ins ha entochen dacheu buca saviu realisar tals indrezs fotovoltaics alpins ei specialmein la part dils generaturs (meisas da modul) in'incumbensa fetg pretensiura. L'entira part dils generaturs vegn a muntar a rodund 50 pertschien dils cuosts d'investiziun.

Ils cuosts d'investiziun bruts muntan a rodund 100 milliuns francs (eventualas contribuziuns da promozion mira cefra 4.13).

Ultra dils cuosts d'investiziun ei il svilup dils prezis sin la fiera d'energia igl element principal per in'investiziun rentabla. La finanziaziun digl indrez fotovoltaic vegn fatga cun agen capital e capital jester.

4.13. Contribuziuns da promozion (contribuziun unica)

L'indemnisaziun unica per indrezs gronds da fotovoltaic cuviera maximalmain 60 pertschien dils cuosts d'investiziun imputabels. En ina calculaziun dalla rentabilitad sto la part dils cuosts buca cuvretgs vegnir cumprovada.

La damonda per ina contribuziun unica sa vegnir inoltrada agl uffeci federal d'energia pér suenter ina lubentscha da bagheggiar legalmein valeivla. Sche las premissas per il dretg digl indrez ein avon maun, sche la quantitat maximala da

2 TWu ei aunc buc exaurida ell'entira Svizra e sche avunda mieds finanzials ein avon maun, garantescha igl uffeci federal d'energia l'indemnisaziun unica provisoricamein.

Ulteriuras premissas per survegnir la contribuziun dalla confederaziun ein, ch'igl indrez sto haver ina producziun annuala da minimalmein 10 GWu e per kWp installau, sto la quota dalla producziun d'unviern esser tier silmeins 500 kWu. La contribuziun da promozion definitiva vegr concedida pér treis onns suenter ch'igl indrez ei vegnius mess en funcziun cumpleinamein.

4.14. Rescas ord vesta dall'Axpo

L'Axpo vesa las suandontas rescas principales tier la realisaziun dil project grond:

- schliata rentabilitad, prezis bass sin la fiera d'energia
- protestas, entardaments el process da permissiun
- stretgas da furniziun da material, munconza da disponibladad da firmas da montascha
- prighels dalla natira, vent, neiv, garniala

4.15. Spazzada

Tenor la perspectiva actuala eis ei previu da demontar igl entir indrez sil pli baul en 60 onns. Ils moduls da fotovoltaic han ina durada da veta da rodund 30 onns. Quei vul gir ch'ils moduls ston vegnir remplazzai suenter 30 onns. Tenor art. 71a al. 5 LEn ston ils indrezs gronds da fotovoltaic vegnir baghegai anavos cumplettamein e la situaziun da partenza sto vegnir restabilida. Ella damonda da baghegiar ston il concept da spazzada e la finanziazion respectiva vegnir presentai concretamein.

4.16. Plan da terms

En cass che la cuminanza dils votants all'urna dat il consentiment, vegnan ils projectants ad inoltrar la damonda da baghegiar al cantun Grischun (edifecis e stabiliments ordeifer la zona da baghegiar) per survegnir la lubientscha da baghegiar miez 2024. Parallel vegnan fatgas las empremas publicaziuns. Igl ei previu d'entscheiver cun las lavurs da construcziun la primavera 2025.

5. Tgei avantatgs porta il project alla vischnaunca?

En contractivas intensivas ha la vischnaunca Ilanz/Glion fixau cun l'Axpo Solutions AG las suandontas condiziuns da basa e valurs directivas a scret en ina declaraziun d'intenziun. Quellas ein da concretisar consequentamein en in contract:

- L'indemnisaziun per il diever dil terren succeda en fuorma d'ina recumpensa che dependa dalla producziun ed importa 1.20 rp/kWu el semester d'unviern e 0.20 rp/kWu el semester da stad. Decisiv ei l'energia effectiva che vegg producida annualmein cun igl implont. Supplementarnein vegg pagau annualmein in prezi fix sin basa dalla producziun calculada da 0.30 rp/kWu el semester d'unviern e 0.05 rp/kWu el semester da stad. Sin basa dalla prestaziun da producziun planisada maximala seresultassen entradas annualas da tochen CHF 385'000.00.
- L'ovra electrica ch'ei aunc da fundar vegg ad haver siu domicil fiscal ella vischnaunca dad Ilanz/Glion. La vischnaunca Ilanz/Glion ha il dretg sin in sez el cussegl d'administraziun dalla societad dall'ovra electrica.
- L'Axpo indemnisescha ils dretgs necessaris da passar cun conducts el rom dallas tariffas ordinarias ella branscha d'electricitat.
- La futura societad dall'ovra electrica paga alla vischnaunca Ilanz/Glion cun la cumpra dalla prospectiva dalla cuminanza d'interess Solalpine in'indemnisaziun da maximalmein CHF 100'000.00.
- La construcziun digl indrez solar planisau duei possibilitar vinavon la pasculaziun dalla biestga. La societad dall'ovra electrica duei indemnifar la corporaziun d'alp da Rueun per in'eventuala perdita da raccolta muort la sminuaziun dalla pastira e la pusseivla sminuaziun dall'alpegiatzun che san sedar ord la realisaziun dil project.
- L'Axpo s'oblighescha d'electrificar durablamein ils edifecis resp. igl intschess dall'Alp da Rueun. Ella separticipescha cun pauschal maximalmein CHF 30'000.00 vid ils cuosts eventuels da realisaziun.
- L'Axpo surpren ils cuosts per in eventual slargiament dallas vias d'access tier l'Alp da Rueun sche quei ei necessari per realisar il project. Ella surpren era ils cuosts da manteniment e reparatura dallas vias d'access suenter la finiziun dallas lavurs sil plazzal.
- El cass che l'installaziun digl indrez fotovoltaic caschuna ina reducziun dil provediment d'aua tier l'Alp da Rueun veggan las ovras electricas a tschaffar ina nova fontauna e colligiar quella cun il provediment d'aua per cumpensar la reducziun.

6. Remarcas finalas

El rom digl express solar ein vegni intercuretgs divers loghens sin igl intschess dalla vischnaunca Ilanz/Glion. L'Axpo Solutions AG ha elegiu l'Alp da Rueun sco liug d'auta valur pervia da sia buna exposiziun che possibilitescha in'auta producziun d'energia solara duront il semester d'unviern. Cun ina surfatscha da rodund 50 hektaras vegg igl indrez sin l'Alp da Rueun a s'adattar al territori che

consista per part d'uaul ed el vegn ad esser veseivels mo naven da paucs punts ellas fracciuns dalla vischnaunca Ilanz/Glion. Cun la lubientscha e la realisaziun dil project sa la vischnaunca Ilanz/Glion generar el futur entradas che gidan da migliurar la situaziun finanziala dalla vischnaunca. Las entradas ord las indemnisiuns vegnan pagadas en in fonds ligont, il qual sustegn projects el sectur dalla giuventetgna/famiglia sco era projects en connex cun energias regenerablas e durabels.

7. Recumandaziun dil parlament communal

Tenor art. 31 al. 1 lit. e dalla constituziun communal schai quella fatschenta ella cumpetenza dalla cuminanza da votantas e votants all'urna.

Il parlament communal ha tractau il messadi dalla suprastonza communal a caschun dalla sesida dils 25 d'october 2023 e deliberau la fatschenta cun 17 encunter 5 vuschs ed in'abstenziun per mauns dalla votaziun all'urna.

Auter che la suprastonza communal ei il parlament communal digl avis ch'il fonds ligiau ad in intent specific duei sper la finanziaziun da projects el sectur dalla giuventegna/famiglia ed el sectur dallas energias regenerablas e projects durabels era survir all'agricultura ed all'alpicultura, etc. (negina enumeraziun definitiva) e che l'utilisaziun vegn mintgamai fixada igl onn suandon el preventiv.

8. Proposta

Sin fundament dallas explicaziuns precedentas fa il parlament communal la suandonta proposta per mauns dalla cuminanza da votantas e votants all'urna:

- Approbaziun dil project dall'Axpo Solutions AG e consentiment dil dretg per diever special per la construcziun d'in implont fotovoltaic grond (incl. reit d'electricitat) sin l'Alp da Rueun.

Parlament communal Ilanz/Glion